

Di acuerdo cu Rudy Lampe di RED

Cambia number di Gabinete Mike Eman den Gabinete Buchi Robez



DIAMARS ultimo, dia 20 di september 2011, 8 pais a firma e Declaracion di e Alianza Mundial pa Gobiernonan Abierto, un documento cu Nacionnan Uni ta impulsa riba iniciativa di Merca. Despues di Wikileaks mas y mas a bira bisto cu transparencia den gobernacion ta necesario. Pa medio di e Declaracion aki e paisnan ta compromete e Gobi-

ernonan di ta transparente y pa combati corrupcion. E Hefenan di Estado cu a firma e declaracion aki ta di: Merca, Mexico, Brasil, Noruega, Inglaterra, Surafrica, Indonesia y Filipinas, segun Rudy Lampe di partido RED.

Un di e motornan tras di e Declaracion aki ta dra. Jacqueline

Peschard, Directora di e Instituto Federal de Acceso a la Información y Protección de Datos (IFAI), kende ta forma parti di e delegacion di Mexico cu a firma e Declaracion menciona.

Riba e potret por aprecia dr. Rudy Lampe hunto cu dra. Jacqueline Peschard, kendenan hunto a participa n'e Congreso Internacional tocante Estudio-nan Electoral cu a tuma lugar na Mexico City di 30 di augustus te cu 3 di september 2011.

Dra. Peschard a declara cu e 5 principionan di e Declaracion aki ta: Transparencia, participacion ciudadano, accountability (rendicion di cuenta), inovacion y tecnologia. Dra. Peschard a sigui informa cu IFAI ta compromete su mes den ehecurion di 4 di e 5 principionan aki: Mehora e servicio na publico, aumenta e integridad den Gobierno, administra cu

mas eficacia e recursonan publico y mehora e exigencia di accountability.

Dra. Jacqueline Peschard di IFAI a saca e siguiente comunicado: "La Alianza Mundial por los Gobiernos Abiertos es un esfuerzo multilateral tendente a propiciar compromisos concretos de parte de las naciones para promover la transparencia, aumentar la participación ciudadana en los asuntos públicos, combatir la corrupción y aprovechar las nuevas tecnologías para robustecer el buen gobierno".

Aruba ta kedando atras mirando e tendencia mundial aki, asina dr. Rudy Lampe a informa n'e encuentro internacional. E Gobiernonan di Aruba cada bez ta mes sera enbez di ta mas habri. Por ehempel, Gobierno a keda, beat around the bush' pa loke t'e contrato miyonario p'e

trailernan di scol..

Segun e Declaracion aki for di hopi tempo caba, e contrato aki mester ta riba website di Gobierno, cu tur informacion, cuanto placa, ken a haye, etc. Si esaki a sosode tur hende por a wak cu Gabinete Mike Eman a viola e ley di contabilidad, pasobra no a tene destaho publico y no tabatin motibo legal pa no a tene destaho publico.

Nos ley di contabilidad ta masha cla den esaki; solamente ora di emergencia manera un horcan no ta obliga pa tene un destaho publico. Anto net e scolnan na Noord cu a sufri daño di naturaleza, e muchanan ta sigui sin haya les, pasobra Gobierno no a actua cu emergencia.

Kier men Gabinete Mike Eman mester keda yama Gabinete Buchi Robez. Ta bisto cu e Gobierno aki ta atende cu emergencia su financiadornan di campaña y ta atende poco poco e pueblo, di acuerdo cu dr. Rudy Lampe, vocero di RED.